

續資治通鑑長編
(136册)



欽定四庫全書提要

續資治通鑑長編五百二十卷宋李燾撰燾有說文解字五音韻譜已著錄燾博極羣書尤究心掌故以當時學士大夫各信所傳不考諸實錄正史家自爲說因踵司馬光通鑑之例備采一祖八宗事蹟薈粹討論作爲此書以光修通鑑時先成長編燾謙不敢言續通鑑故但謂之續資治通鑑長編文獻通考載其進書狀四篇一在隆興元年知榮州時先以建隆迄開寶年事一十七卷上進一在乾道四年爲禮部郎時以整齊建隆元年至治平四年閏三月五朝事蹟共一百八卷上進一在淳熙元年知瀘州時以治平後至靖康凡二百八

十卷上進一在淳熙元年知遂甯府時重別寫呈并舉要目錄計一千六十三卷六百八十七冊上進故周密癸辛雜識稱韓彥古盜寫其書至盈二廚然文獻通考所載僅長編一百六十八卷舉要六十八卷與進狀多寡迥殊考陳振孫書錄解題稱其卷數雖如此而冊數至逾三百蓋逐卷又分子卷或至十餘云云則所稱一千六十三卷者乃統子卷而計之故其數較多矣又據燾進狀其書實止於欽宗而王明清玉照新志稱紹興元年胡彥修疏在長編一百五十九卷注後則似乎兼及高宗或以事相連屬著其歸宿附於注末如左傳後經終事之例歟癸辛雜識又稱燾爲長編以木

廚十枚每廚抽替匣二十枚每替以甲子誌之凡
本年之事有所聞必歸此匣分日月先後次第之
井然有條云云則其用力之專且久可概見矣其
書卷帙最多當時艱於傳寫書坊所刻本及蜀中
舊本已有詳略之不同又神哲徽欽四朝之書乾
道中祇降祕書省依通鑑紙樣繕寫一部未經鏤
版流播日稀自元以來世鮮傳本

本朝康熙初崑山徐乾學始獲其本於泰興季氏凡
一百七十五卷嘗具疏進之於

朝副帙流傳無不珍爲祕乘然所載僅至英宗治平
而止神宗以後仍屬闕如檢永樂大典宋字韻中
備錄斯編以與徐氏本相較其前五朝雖大概相

合而分注考異往往加詳至熙甯迄元符三十餘
年事蹟徐氏所闕而朱彝尊以為失傳者今皆粲
然具存首尾完善實從來海內所未有惟徽欽二
紀原本不載又佚去熙甯紹聖間七年之事頗為
可惜然自哲宗以上年經月緯遂已詳備無遺以
數百年來名儒碩學所欲見而不得者一旦頓還
舊物視現行諸本增多幾四五倍斯亦藝林之鉅
觀矣昔明成化中詔商輅等續修通鑑綱目時永
樂大典庋藏內府外庭無自而窺竟不知燾之舊
文全載卷內乃百方別購迄不能得論者以為遺
憾今恭逢我

皇上稽古右文編摩四庫乃得重見於世豈非顯晦有

時待

聖世而發其光哉燾原目無存其所分千餘卷之次第已不可考謹參互校正量其文之繁簡別加釐析定著爲五百二十卷燾作此書經四十載乃成自實錄正史官府文書以逮家錄野記無不遞相稽審質驗異同雖采摭浩博或不免虛實竝存疑信互見未必一一皆衷於至當不但太宗斧聲燭影之事於湘山野錄考據未明遂爲千古之疑竇卽如景祐二年三月賜鎮東軍節推毛洵家帛米一事核以余靖所撰墓銘殊不相符爲曾敏行獨醒雜志所糾者亦往往有之然燾進狀自稱甯失之繁毋失之略蓋廣蒐博錄以待後之作者其淹貫

詳贍固讀史者考證之林也

古間字

宋司馬溫公欲作資治通鑑先使劉攽等為長編其後李文簡為續長編實繼溫公通鑑而作曰續長編不曰續通鑑謙也然文簡此書上據國典下采私記參考異同折衷一是使北宋一代事實粲然明備實為通鑑後不可不讀之書後之讀史者病宋史之蕪雜憾遼史之疏漏然則欲考北宋遺事舍此書曷以哉其書久無全本乾隆閒從永樂大典輯補之成五百二十卷四庫著錄焉然閣本既不易覲世所傳者惟張氏愛日廬本蓋即以閣本為據而用活字排印者曩官京師時曾一見之魚魯之訛觸處皆是欲覓善本校讎迄不可得竊歎溫公通鑑自南宋已盛行至今學者推為史家絕作言編年之史必首舉此書而李氏續長編則若存

續資治通鑑長編

序

若亡雖博雅之士有不獲見者何顯晦之懸殊若此竊
有志重刊此書而力未逮也及出守杭州西湖 文瀾
閣所庋亦殘闕至己卯歲由陝西移撫浙中乃從丁君
松生假得愛日廬本而以閣中殘本校之付書局刊刻
妙選局中高才生使預校讎之役時則若楊編修文瑩
戴編修兆春沈吉士善登濮吉士子潼潘中書鴻嚴主
事辰姚主事烺夏主事敦復譚主事日襄黃教諭以周
王訓導詒壽陳訓導謨徐訓導惟錕周訓導善溥馮舉
人一梅王拔貢崇鼎張副貢大昌倪廩生鍾祥皆兩浙
知名之士也於此書孜孜討論有一字之疑必考之宋
史又參考於宋代紀載之書及諸家文集以求其是俞
太史樾復綜核之積一年之力剗剗始成李氏此書從

此大顯於世必與溫公通鑑同爲史家所推重而余數
十年心願亦庶幾告慰矣書成因弁言於簡端俾讀李
氏書者知其緣起云時光緒七年九月
兵部尙書升任陝甘總督浙江巡撫譚鍾麟序

進續資治通鑑長編表

臣燾言臣先于去年八月準尚書省劄子三省同奉聖旨依敷文閣直學士汪應辰奏取臣所著續資治通鑑自建隆迄元符令有司繕寫校勘藏之祕閣臣尋于十四日蒙恩賜對面奉聖旨令臣早投進遂除官郎省兼職史局續又準尚書省劄子奉聖旨令臨安府給札臣今先次寫到建隆元年至治平四年閏三月五朝事迹共一百八年計一百八卷內建隆元年至太平興國元年太祖一朝事迹雖曾于隆興元年臣知榮州日具表投進已蒙降付史館後來稍有增益謹重別鈔錄投進外餘治平以後文字增多兼監修四朝正史未畢欲望聖慈特賜寬假臣更加整齊節次修寫投進疏遠微賤

僭爲此書罪當誅絕聖主不卽麾斥乃過聽而兼收之
臣死且不朽矣臣誠惶誠恐稽首頓首臣竊聞司馬光
之作資治通鑑也先使僚屬採摭異聞以年月日爲叢
目叢目旣成乃修長編唐三百年范祖禹實掌之光謂
祖禹長編甯失于繁無失于略當時祖禹所修長編蓋
六百餘卷光細刪之止八十卷今資治通鑑唐紀自一
百八十五卷至二百六十五卷是也故神宗皇帝序其
書以爲博而得其要簡而周于事臣誠不自揆度妄意
纂集雖義例悉用光所創立錯綜銓次皆有依憑其間
牴牾要亦不敢自保區區小忠前表蓋嘗具之仰惟祖
宗之豐功盛德當與唐虞三代比隆乾坤之容日月之
光繪畫臻極訖弗能近矧令拙工彊施丹堊臣誠愚闇

豈不知罪然而統會眾說培擊僞辨使姦欺訛訕不能
乘隙亂真祖宗之豐功盛德益以昭明譬諸海嶽或取
涓埃之助顧臣此書詎可便謂續資治通鑑姑謂續資
治通鑑長編庶幾可也其篇帙或相倍蓰則長編之體
當然甯失于繁猶光志云爾伏惟皇帝陛下煥乎文章
固已經緯兩儀黼黻萬化如臣薄技又安足陳陛下徒
以祖宗之孫謀彝憲往往在是遂委曲加惠導之使前
承命距躍干冒來獻夤緣幸會得御燕閑千百有一儻
符神指更擇耆儒正直若光者屬以刪削之任遂勒成
我宋大典垂億萬年如神宗皇帝所謂博而得其要簡
而周于事者則將與六經俱傳是固非臣所能而臣之
區區小忠因是亦獲自盡誠死且不朽矣所有續資治

通鑑長編一百八卷今寫成一百七十五冊并目錄一冊謹隨表上進干瀆宸嚴下情無任戰汗屏營之至臣燾誠惶誠恐稽首頓首謹言乾道四年四月日左朝散郎尚書禮部員外郎兼國史院編修官臣李燾上

隆興元年知榮州李燾奏臣嘗盡力史學于本朝故事
尤切欣慕每恨學士大夫各信所傳不攷諸實錄正史
紛錯難信如建隆開寶之禪授涪陵岐魏之遷歿景德
慶厯之盟誓曩霄諒祚之叛服嘉祐之立子治平之復
辟熙甯之更新元祐之圖舊此最大事家自爲說臣輒
發憤討論使眾說咸會于一敢先具建隆迄開寶十有
七年爲十有七卷上進

馬端臨文獻通考

乾道四年禮部郎官李燾上言臣準朝旨取臣所著續
資治通鑑自建隆迄元符令有司繕寫投進今先次寫
到建隆元年至治平四年閏三月五朝事迹共一百八
卷投進治平以後文字增多容臣再加整齊節次投進
臣竊聞司馬光之作資治通鑑也先使其寮采摭異聞

以年月日爲叢目叢目旣成乃修長編唐三百年范祖禹實掌之光謂祖禹長編甯失于繁無失于略今唐紀取祖禹之六百卷刪爲八十卷是也臣今所纂集義例悉同光所創立錯綜銓次皆有依憑顧臣此書詎可便謂續資治通鑑姑謂續資治通鑑長編可也旁採異聞補實錄正史之闕略參求真是破巧說僞辨之紛紜益以昭明祖宗之豐功盛德區區小忠或可錄所有續資治通鑑長編一百八卷隨表上進

同上

淳熙元年知瀘州李燾上言臣先次投進續資治通鑑長編自建隆迄治平今欲纂集治平以後至中興以前六十年事迹庶幾一祖八宗之豐功盛德粲然具存無所闕遺顧此六十年事于實錄正史外頗多所增益首